

**CONVENIO DE COLABORACIÓN ENTRE A CONSELLERÍA DO MAR DA XUNTA DE GALICIA E O CONSELLO REGULADOR DA D.O.P. MEXILLÓN DE GALICIA PARA A PROMOCIÓN E A MELLORA DA COMERCIALIZACIÓN DO MEXILLÓN CERTIFICADO D.O.P. NO ANO 2021**

En Santiago de Compostela , o día **23 SET 2021** , na sede da Consellería do Mar,

**REUNIDOS**


Dunha parte, Dona Mercedes Rodríguez Moreda, en calidade de directora xeral de Pesca, Acuicultura e Innovación Tecnolóxica, actuando en nome e representación da Consellería do Mar, por delegación da conselleira, en virtude das facultades delegadas que lle confire a ORDE do 8 de setembro de 2017, da mesma consellería, publicada no DOG núm. 180, 21 de setembro, e de conformidade co Decreto 50/2021, do 11 de marzo, polo que se aproba a estrutura orgánica da Consellería do Mar.

E doutra, Dona Adelina María Solla Sanmartín, con DNI n.º 35.308.842R, en representación do Consello Regulador da DOP Mexillón de Galicia de acordo coa Orde do 17 de novembro de 2020 pola que se nomean o presidente e os vicepresidentes do Consello Regulador da Denominación de Orixe Protexida Mexillón de Galicia-Mejillón de Galicia, tras o proceso electoral convocado mediante a Orde do 8 de xullo de 2020, e coas facultades recoñecidas na Orde do 20 de marzo de 2019 pola que se aproba o Regulamento da denominación de orixe protexida Mexillón de Galicia-Mejillón de Galicia e o seu Consello Regulador.

**EXPOÑEN**

**PRIMEIRO:**

Que a actividade pesqueira, marisqueira e acuícola é un dos principais motores da economía galega que sitúa a Galicia, pola riqueza da súa produción, como a primeira das comunidades pesqueiras da Unión Europea.



SEGUNDO:

Que o Estatuto de Autonomía de Galicia atribúe á Comunidade Autónoma, no seu artigo 28º, a competencia para o desenvolvemento lexislativo e a execución da lexislación do Estado no ámbito da ordenación do sector pesqueiro. Neste sentido o artigo 3.4 da Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, inclúe dentro das materias correspondentes á competencia da Comunidade Autónoma as relativas á ordenación do sector pesqueiro galego, á ordenación das estruturas, aos mercados, á comercialización, á manipulación, á transformación e á conservación dos produtos pesqueiros e a promoción das estruturas de comercialización mediante o apoio aos sectores produtivos na distribución dos produtos do mar.


A Consellería do Mar ten entre os seus obxectivos prioritarios a potenciación, difusión e promoción dos sectores e produtos pesqueiros galegos, co fin de intensificar o coñecemento dos mesmos e incrementar así a súa competitividade. Neste senso, no apartado d) do artigo 97 da lei 11/2008, de pesca de Galicia, establece que a política da Comunidade Autónoma de Galicia terá como obxectivo en relación coa comercialización, a transformación e a promoción dos produtos pesqueiros a promoción dos produtos de alta calidade para mercados altamente especializados.

TERCEIRO:

O Regulamento (UE) núm. 508/2014 do Parlamento Europeo e do Consello, relativo ao Fondo Europeo Marítimo e de Pesca, dentro do Eixo 5, e no artigo 68, recolle que o FEMP poderá apoiar medidas de apoio á comercialización e á transformación (Medida 5.1.3. Medidas de comercialización), encamiñadas a aplicar unha política de calidade e valorización.

Á Consellería do Mar correspóndelle a realización de accións de promoción dos produtos da pesca e da acuicultura así como a realización de accións que fomenten as denominacións de orixe e os distintivos de calidade, por isto é consciente de que a valorización dos produtos do mar por parte dos consumidores finais constitúe un dos principais eixes da política de mellora de comercialización pesqueira, xa que logo, repercute directamente sobre a demanda deses produtos.

Neste sentido, e dentro do marco de actuacións da Consellería do Mar, figuran como accións fundamentais deste proceso a participación e colaboración da consellería con entidades significativas que teñan como finalidade dar a coñecer, entre outros, os produtos procedentes da acuicultura.



**CUARTO:**

Que o Consello Regulador da DOP Mexillón de Galicia é órgano de xestión e control da dita denominación, de acordo co disposto no Regulamento (UE) nº 1151/2012 do Parlamento Europeo e do Consello, do 21 de novembro de 2012, sobre os réximes de calidade dos produtos agrícolas e alimenticios; na Lei 2/2005, do 18 de febreiro, de promoción e defensa da calidade alimentaria galega; no Decreto 4/2007, do 18 de xaneiro, polo que se regulan as denominacións xeográficas de calidade do sector alimentario e os seus consellos reguladores; e no Regulamento (CE) nº 1050/2007 da Comisión Europea polo que se inscribe no Rexistro de Denominacións de Orixe Protexidas da Unión Europea a denominación Mexillón de Galicia. Polo tanto é a única entidade capacitada para executar tanto investimento material como o inmaterial obxecto deste convenio de colaboración, polo que non sería posible promover a concorrència competitiva con ningunha outra.

Que por canto a Consellería do Mar e o Consello Regulador da DOP Mexillón de Galicia están interesados na potenciación do sector da acuicultura, tanto dende un punto de vista da obtención de produtos certificados no ámbito da produción primaria como do sector transformador destes produtos, así como na mellora da situación socioeconómica das xentes que viven del, polo que cómpre establecer as condicións que permitan a coordinación de accións que repercutan nunha mellora da comercialización e accións de promoción destes produtos de alta calidade.


**QUINTO:**

Que as partes anteriormente referenciadas, consideran de mutuo interese a realización dunha serie de accións que redunden nunha mellora do sector acuícola e das industrias relacionadas en materias tales como comercialización, promoción e fomento do consumo de produtos certificados.

**SEXTO:**

Que para o desenvolvemento das actividades que se indican máis adiante, as partes, de forma conxunta, dispoñen de medios humanos e materiais suficientes.

Na súa virtude, e dada a existencia dun interese coincidente, ambas partes acordan formalizar o presente convenio de acordo coas seguintes



## CLÁUSULAS

### PRIMEIRA.- OBXECTO DO CONVENIO.

O obxecto do presente convenio é establecer as bases de colaboración entre a Consellería do Mar e Consello Regulador do Mexillón de Galicia para a coordinación de accións que conleven á mellora da comercialización do mexillón certificado, así como accións de promoción. As accións específicas que se van realizar derivadas deste obxecto son as que seguen:

#### **1 Estudo para o desenvolvemento de ecoenvase eficiente e económico para Mexillón de Galicia DOP fresco.**


A principal función do envase dos alimentos é protexelos e preservalos da contaminación exterior. O envase cumpre funcións de grande importancia na comercialización dos produtos: conter os alimentos, protexelos da deterioración química e física, e proporcionar un medio práctico para informar os consumidores sobre as súas propiedades. Dado que na actualidade, unha das tendencias que gaña unha maior forza no mercado é o uso de *packaging* sostible dende un punto de vista ambiental e a súa posibilidade de reciclaxe, derivada da preferencia por distintos tipos de consumidores que os prefiren e os converten nun factor importante á hora de decantarse por un produto ou por outro, realizarase unha prospección entre as empresas asociadas para determinar as características máis adecuadas que deben cumprir os materiais e o envase para adecuarse as necesidades do produto en fresco.

Recompilase información sobre ecomateriais empregados na fabricación de envases alimentarios, requisitos legais para os mesmos, etc, analizarase posibles desenvolvementos de novos materiais e establecerase un plan de traballo que sirva como base para accións futuras que fomenten a calidade e o valor engadido deste produto.

#### **2 Determinación do perfil nutricional e propiedades saudables do Mexillón de Galicia**

Dende fai longo tempo, as propiedades nutricionais dos produtos alimenticios esperta un amplo interese entre os consumidores, mostrándose potencialmente capaz de influír nas súas pautas de compra e consumo alimentario

Sendo coñecedores de que os produtos do mar conteñen propiedades nutricionais que os converten en alimentos fundamentais dentro do que se considera unha alimentación equilibrada e cardiosaludable realizarase unha recompilación bibliográfica da información nutricional dispoñible para os moluscos bivalvos e paralelamente iníciarase un programa de recollida de mostras de mexillón comercial durante a



campaña de fresco para determinar os principais nutrientes tendo en consideración a flutuación da composición do mexillón segundo a época do ano.

Esta acción permitirá ademais definir próximos análises de interese para detallar a composición nutricional e propiedades saudables do Mexillón de Galicia que poidan ser resaltados no etiquetado do produto certificado que postos en coñecemento do consumidor o faga decantarse pola súa compra e desta forma se poida acceder a novos nichos de mercado.

### 3 Recopilación de información de cara a elaborar una correcta estratexia de promoción e comercialización.


Na estrutura ideal dun plan de marketing a primeira das fases é a análise da situación inicial xa que é de suma importancia analizar como está posicionada a organización en relación co mercado, a industria e sobre todo a competencia. Dentro desta fase é imprescindible a recopilación de información tanto interna como externa para a correcta elaboración dunha análise DAFO.

Na matriz DAFO (en inglés SWOT- *Strengths, Weaknesses, Oportunities e Threats*) recóllense as debilidades, ameazas, fortalezas e oportunidades que se lle presentan á organización, e que permite realizar un diagnóstico dos aspectos internos e externos máis relevantes.

De cara á elaboración desta Análise, no marco do presente convenio establécese a recopilación de determinada información interna relevante:

- para a coñecer o impacto do cambio climático na calidade e cantidade de produto certificado a comercializar, iníciase a monitorización do proceso produtivo en colaboración co equipo investigador do IIM-CSIC mediante a mostraxe de mexillón a distintas alturas durante a segunda fase do ciclo de produción para determinar o crecemento, engorde e capacidade de agarre do mexillón, así como o volume de mexillón desprendido. Igualmente tomaranse mostras para o estudo da fauna acompañante e defínense futuros análises que permitan estudar a captación de cría mediante colectores tendo en consideración a variabilidade temporal e espacial da mesma.

- para coñecer a vulnerabilidade da produción de mexillón certificado fronte á posible establecemento de especies alóctonas nos bancos naturais de mexillón, realizarase unha recopilación bibliográfica de información sobre as especies (animais e algas) que conviven co mexillón no intermareal e, defínese un programa para o seguimento das especies acompañantes do mexillón no intermareal.



#### 4 Axendas 2022

Para o novo ano, prevese editar axendas personalizadas, xa que son un regalo promocional perfecto e a marca da DOP permanecerá presente os 365 días do ano pois garante case absolutamente o ser usada polo receptor. Os presentes promocionais son unha estratexia de márketing que non pasa de moda pero a clave para que sexan aínda máis efectivos é que resulten útiles no día a día. Ademais, na era dixital, marca maior conexión co receptor.

A calidade xoga un papel fundamental á hora de elixir un regalo promocional pois por exemplo, se é útil, funciona ben e é duradeiro creará unha sensación de benestar arredor da marca.

Neste caso, escollerase unha encadernación en espiral, a máis práctica xa que permite que a axenda personalizada se abra por completo resultando máis cómoda ao momento de escribir.

Respecto da cuberta, levará marcado o noso selo e un eslogan chamativo.

Citas, trucos, recomendacións relacionadas coa marca, co Mexillón de Galicia, información sobre o sector, receitas,... axudarán a mellorar a visibilidade ao igual que o deseño natural, atractivo e coas cores corporativas.


Imprimiremos 600 unidades que serán remitidas por mensaxería a axentes do sector, profesionais da distribución, representantes da administración, xornalistas,...

#### 5 Mostra de Mexillón de Galicia fresco

A DOP busca en todas as súas accións promocionais o incremento da identificación e recoñecemento do seu selo así como a mellora da valorización de Mexillón de Galicia no mercado.

O coñecemento e recoñecemento do selo por consumidores e profesionais é básico para fortalecer a D.O.P. Mexillón de Galicia como distintivo de calidade e orixe e por extensión, aos seus integrantes, produtores e empresas depuradoras e transformadoras. Por un lado, protexe os postos de traballo dos axentes do sector que se esmeran por acadar un produto e alimento de altísima calidade, de proximidade, cultivado de forma única, natural e sostible que xera riqueza no entorno local e arraiga poboación aos territorios onde se cultiva. Sen esquecer por suposto, a protección ao consumidor grazas á información clara e veraz que ofrece un produto con este distintivo.

Neste senso, quérese facer chegar a representantes da gran distribución, xornalistas, representantes de administracións,... unha caixa cunha bandexa de 1 quilo de Mexillón de Galicia fresco. En total serían 100 unidades.



## 6 Visibilidade en Campo de Golf de Meis

O Mexillón de Galicia é un produto cultivado de forma natural e respectuosa co medio ambiente. Grazas a riqueza fitoplancónica das augas das Rías Galegas e ao bo facer dos cultivadores podemos gozar dun alimento cunhas propiedades nutricionais ideais para unha dieta saudable.

Unha forma de promocionar o Mexillón de Galicia como alimento é vinculalo co seu entorno e no marco dun contexto de benestar social, natureza, deporte e saúde. O binomio saúde-deporte é por tanto un factor moi atractivo para o consumidor á hora de escoller un alimento ou outro.

Neste senso, en colaboración coa Fundación Monte Castrove apóstase por visibilizar Mexillón de Galicia no Campo de Golf de Meis o que tamén permite a vinculación co tecido produtivo mexilloeiro.

Para facilitar a visibilidade de Mexillón de Galicia o CR ocupárase do deseño, fabricación e instalación de elementos de sinalética e personalización, que incorporan nome, logotipo e código QR e quedarán debidamente anclados no campo. Instalaremos concretamente 2 maquetas de batea en 2 lagos do campo así como 2 atriles expositores nos bordes de cada un dos 2 lagos.


## 7 Calendario 2022

Ao igual que as axendas, quérese deseñar un calendario de sobremesa 2022 pois considérase que para o usuario é un obxecto útil e trátase dun recordatorio diario de Mexillón de Galicia como produto, alimento e marca.

O calendario en pdf colgarase na época de Nadal nas redes sociais do CR da DOP e tamén imprimíranse 2.100 exemplares para o envío a produtores, elaboradores e comercializadores de mexillón en Galicia así como cocíñeiros, centros de formación de hostalería, representantes de administracións autonómicas, provinciais e locais, persoas relacionadas coa cultura, a sociedade e a economía galega, consellos reguladores, universidades, centros de investigación, etc.

## 8 Felicitación Nadal

A felicitación de Nadal é un clásico que non podemos esquecer. Nestes tempos en que a sociedade se move dentro dunha inmediatez e voráxine desmesurada, unha Felicitación de Nadal é un guiño á tradición, ao natural, ao ben feito, cualidades compartidas coa esencia do cultivo do Mexillón de Galicia.



Consideran o deseño en pdf da felicitación para colgala nas nosas redes sociais e chegar ao maior número de destinatarios posible.


**SEGUNDA.- CONDICIÓN ECONÓMICAS.**

As actuacións recollidas no presente convenio son financiadas polo Fondo Europeo Marítimo e de Pesca (FEMP). Faise constar tamén a elixibilidade da actuación que se pretende a través da contratación que se propón no marco da Prioridade da Unión, Obxectivo e Medida do FEMP: 5.1.3: Medidas de comercialización, prevista no artigo 68 do Regulamento (UE) 508/2014, do 15 de maio. Esta participación farase constar en todas as actuacións se realicen ao abeiro deste convenio.

O Consello Regulador da DOP Mexillón de Galicia empregará a totalidade da achega económica desta cláusula nas accións derivadas do obxecto deste convenio, non obtendo ningún beneficio económico desta consignación orzamentaria.

Poderanse facer pagos parciais contra a presentación das facturas polos investimentos inmateriais realizados, ás que se xuntarán as memorias de cada actividade e as certificacións actualizadas expedidas por cada súa administración que acrediten que a entidade está ao corrente nas súas obrigas tributarias e sociais, así como que non ten débedas pendentes contraídas coa administración da Xunta de Galicia. As facturas deberán ser conformadas pola Dirección Xeral de Pesca, Acuicultura e Innovación Tecnolóxica para estes efectos.

Para facer efectivo o último pagamento presentarán a memoria final á que se fai referencia na cláusula terceira seguinte.



### **TERCEIRA.- OBRIGAS**

O Consello Regulador da DOP Mexillón de Galicia obrígase a realizar as accións especificadas na cláusula primeira do presente convenio.

No marco do presente convenio, o Consello Regulador da DOP Mexillón de Galicia obrígase a facer constar a participación da Consellería do Mar e do Fondo Europeo Marítimo e de Pesca (FEMP) nas exhibicións publicitarias que teñan lugar no marco deste convenio.

Finalmente presentará diante da Consellería do Mar unha memoria descritiva da realización do obxecto do convenio; así como unha conta de resultados en relación á finalidade do convenio, que abrangan todos os gastos e ingresos nos que se incorreu na organización das accións obxecto do convenio.


Ademais; deberá aportar xustificantes dos gastos realizados, que consistirán, de forma xeral, nas facturas desagregadas e demais xustificantes de gasto de valor probatorio equivalente, contratos (de obra ou servizo) e nóminas, detallados o máximo posible. Así mesmo deberá presentar xustificantes de pago referidos as facturas e demais xustificantes de gastos aportados. Os xustificantes bancarios deberán soportar o número de factura ou facturas pagadas no caso de transferencias, así como o beneficiario, importe, emisor e data, entre outros, de tal xeito que se poida seguir a rastrexabilidade da operación xustificada.

### **CUARTA.- RÉXIME DE PERSOAL**

A realización das actuacións previstas neste convenio non levará consigo ningún tipo de relación de carácter laboral entre a Consellería do Mar e as persoas que interveñan ou puideran intervir na súa execución, sendo ao Consello Regulador da DOP Mexillón de Galicia responsable das obrigas sociais e laborais que se puideran derivar da contratación, pola mesma, do referido persoal.

### **QUINTA.- SEGUIMENTO.**

Aos efectos de coidar do cumprimento de estipulado no presente convenio créase unha Comisión de Seguimento do mesmo, que estará composta polo xefe do Servizo de Mercados, en representación da Consellería do Mar, e pola responsable de Promoción do Consello Regulador da DOP Mexillón de Galicia. A dita comisión, que se xuntará a petición de calquera das partes, será o mecanismo de actuación conxunta para garantir a efectividade do convenio.



Neste senso, o Consello Regulador da DOP Mexillón de Galicia atenderá ás indicacións, suxestións e requirimentos que se lle formulen desde a Consellería do Mar en relación co obxecto do presente convenio.

Será necesario que durante a execución das diferentes actividades a Consellería do Mar dispoña de toda a información dos eventos e que de o seu visto e prace antes da súa realización.

**SEXTA.- VIXENCIA.**

A vixencia do presente convenio estenderase desde a súa sinatura e ata o 30 de decembro de 2021, non sendo susceptible de prórroga.

**SÉTIMA- RESOLUCIÓN.**

Serán causa de resolución do convenio o mutuo acordo das partes e o incumprimento das cláusulas contidas no mesmo.

**OITAVA.- CARACTER DO CONVENIO**

Este convenio ten a natureza dos previstos no artigo 6 da Lei 9/2017, de 8 de novembro, de contratos do sector público e o seu réxime xurídico virá determinado polas estipulacións previstas no propio convenio e os principios xerais resultantes da citada Lei.


A tramitación do presente convenio é ordinaria e existe crédito suficiente previsto na Lei 3/2021, do 28 de xaneiro, de orzamentos xerais da Comunidade Autónoma de Galicia para o ano 2021.

**NOVENA.- LITIXIOS.**

As cuestións controvertidas xurdidas sobre a interpretación, modificación, resolución e efectos que puideran derivarse da aplicación do presente convenio deberán ser solucionadas pola Comisión de Seguimento á que se refire a cláusula quinta anterior. Se non se puidera alcanzar dito acordo, as posibles cuestións litixiosas serán de coñecemento e competencia da orde xurisdiccional contencioso-administrativa.

**DÉCIMA. AUTORIZACIÓN PARA A PUBLICACIÓN DOS DATOS DOS ASINANTES NO PORTAL DE TRANSPARENCIA**

Consonte ao establecido nos artigos 12 a 16 da Lei 19/2013, de 9 de decembro, de transparencia, acceso á información pública e bo goberno en concordancia cos artigos 24 e 25 da Lei 1/2016, do 18 de xaneiro, de transparencia e bo goberno, os asinantes outorgan o seu consentimento para que os datos persoais que



constan no convenio e mais no resto das especificacións contidas no mesmo poidan ser publicadas no Portal de Transparencia e Goberno Aberto.

E para que así conste, en proba de conformidade e previa a súa lectura, as partes asinan o presente convenio por triplicado exemplar e a un só efecto no lugar e data ao comezo indicados.

Pola Consellería do Mar

Polo Consello Regulador da DOP Mexillón de Galicia

P.D. (Orde do 8-09-2017, DOG nº 180, do 21-09-2017)

A presidenta

A directora xeral de Pesca, Acuicultura e Innovación Tecnolóxica

Mercedes Rodríguez Moreda

Adelina María Solla Sanmartín